

四庫全書

集部

欽定四庫全書

聖祖仁皇帝御製文第三集卷二目錄

勅諭

諭大學士伊桑阿馬齊王熙吳璥熊賜履張英
等

諭大學士伊桑阿等

諭大學士伊桑阿馬齊王熙吳璥熊賜履張英
學士法良辛保傅紳范承烈王九齡曹鑑倫

諭大學士伊桑阿等

諭大學士伊桑阿等

諭工部

諭戶部

諭戶部

諭大學士伊桑阿馬齊吳璵熊賜履張英學士

辛保傅紳范承烈王九齡曹鑑倫

諭大學士伊桑阿馬齊吳璵熊賜履學士辛保

傳紳來道范承烈曹鑑倫

諭大學士伊桑阿馬齊吳璵熊賜履學士辛保
傅紳來道常壽來福范承烈曹鑑倫

諭大學士馬齊等

諭大學士伊桑阿馬齊等

諭刑部

諭內閣

諭戶部

諭漢大學士九卿翰詹科道諸臣

諭刑部

諭大學士王熙

諭禮部

諭吏刑二部

諭禮部

諭戶部

欽定四庫全書

聖祖仁皇帝御製文第三集卷二

勅諭

諭大學士伊桑阿馬齊王熙吳璥熊賜履張英等
今治河事雖稍有緒未可遽稱底績唐埂六壩俱已堵
塞夏秋時黃河水溢加以毛城舖水復入洪澤湖波濤
洶湧則高家堰甚可危目下清水流出雖於運艘有益
但高家堰一有衝決淮揚一帶地方俱不可保其為患

甚大將所修如許工程俱付之無用矣昔于成龍任總河時不塞唐埂六壩非無所見蓋慮此而不行也今斷不可不慎加防護凡此皆朕親臨所見者並非紙上空言也張鵬翮修築石堤甚速彼處運石甚不易成工之速如此可謂實心効力者矣康熙四十年三月二十一日

諭大學士伊桑阿等

自古帝王用人行政皆賴大臣人臣薦舉賢良盡以人

事君之大義雖或薦舉偶有未當若為所舉者因有賢吏之名遂力改所行始則有光於祖父中則奮厲於功名終則不負其所舉斯即良吏也若始以賢而舉之乃改行而為不肖既玷祖父之名復絕功名之路以致貽累於所舉斯則國家之大罪人也天下至大為人君者焉能人人而識別之且官方賢否或操守清正或貪污不肖必難掩於百姓必難逃於衆論其居官即此可以見矣儻所舉之人居官皆善此乃實心為國無私之賢

臣也所舉有善者有不善者此其心雖為國特識鑒未到之故耳若所舉皆貪汙行私此則大玷為臣之義不可一日容於世者也辨別臧否以鼓勵實行權在人主或居小吏時亦有善名及得志之後改行者甚多此則馬能預料既用而復疑之是故以知人為哲以疑則勿用用則勿疑為信私黨雖自昔有之然君子之黨與小人之黨從來未有不明晰者自茲以後朕惟視其居官操守清廉以為實據無庸預為疑度慕琛所奏已悉可

下所司知之康熙四十年五月初二日

諭大學士伊桑阿馬齊王熙吳璵熊賜履張英學

士法良辛保傅紳范承烈王九齡曹鑑倫

高承爵奏報泗州盱眙地方水災著總河張鵬翮會同
兩江總督阿山親行察勘具奏前高家堰閉塞六壩時
朕謂六壩塞完後泗州盱眙等處必被水淹曾向九卿
降有諭旨今六壩方經閉完洪澤湖水長泛溢泗州盱
眙等處城郭果被水災高家堰堤益覺危險朕為此時

厯於懷且天災靡定萬一有異常風暴及地動雷震之事亦未可知儻若高家堰至於危險則揚州淮安等處皆被災矣朕日夜念此甚切憂懼高家堰堤作何保守堅固或另有修治善策著張鵬翮陳奏可差爾衙門中書一員前往康熙四十年五月二十一日

諭大學士伊桑阿等

頃張鵬翮奏開陶莊引河黃河水已向北岸流去若黃流趨向北岸則離清口甚遠乘此時從范承勳所築挑

水壩起寬長加築堤岸過清口將黃河及清口之水儘
向下流再匯合為一處則黃河之水可永無倒灌之虞
朕先曾面勅于成龍今在河官員亦有知者著張鵬翮
問在前曾知此事官員詳明定議奏聞其修堤所需錢
糧即為估計所修之處速繪圖呈覽此事甚為緊要不
得輕忽下所司知之康熙四十年九月初一日

諭大學士伊桑阿等

原任大學士阿蘭泰在日存心端誠為國勤勞素著懋

績今雖身故應贈卹典加授少保太子太保以示朕矜
念効力年久大臣之意特諭康熙四十年九月二十九
日

諭工部

修理永定河並未動支庫帑其在工官員俱係自願捐
修及赴工効力者所捐未完銀兩非侵漁錢糧及為事
捐贖可比且其人亦已亡故若行令該旗責成家屬照
數賠補殊為可憫俱著從寬免行追取康熙四十年十

月初四日

諭戶部

朕孜孜圖治宵旰靡寧於民生疾苦時切軫念甘肅等處地方切近邊陲土田瘠薄今年雨澤愆期田禾多有未穫閭閻饑困朕心深用憫惻已特勅該督撫等官將被災之處親行蠲賑令其得所更念來歲青黃不接西土小民輸納維艱著將甘肅巡撫所屬州縣衛所康熙四十一年分地丁錢糧通行豁免地方有司務期切實

奉行毋令官吏借端侵漁俾小民得均霑實惠以副朕軫恤災黎之意爾部即遵諭行特諭康熙四十年十月初六日

諭戶部

朕惟帝王致治裕民為先免賦蠲租實為要務朕宵旰憂勤咨求民瘼四方利病未嘗少釋於懷矧江蘇等處地方尤為財賦重地朕比年巡幸東南目擊民艱已多方軫恤令其安人猶恐有司奉行不力德澤未盡下究

民生罕遂康阜莫登茲將江蘇巡撫所屬州縣等處除漕項外康熙四十一年地丁錢糧盡行蠲免地方有司務期實意奉行使閭巷窮黎皆得均霑實惠庶幾生民樂利豐裕可期儻不肖官吏仍陽奉陰違私立名色借端科派恣行侵剋負朕愛養生民至意事情發覺定行正法決不姑貸爾部即遵諭行特諭康熙四十年十月初十日

諭大學士伊桑阿馬齊吳璵熊賜履張英學士辛

保傅紳范承烈王九齡曹鑑倫

凡官員本身効力自立官職者身故後應襲之人屬有廢疾遂停止襲職情殊可憫若准令承襲則廢疾在身不能趨赴公家之事此等人員應停給全俸止以每月錢糧支給俟其襲職後或生子或別有應襲之人足以充任使者即准替襲以全俸給之以示朝廷優恤世職之意可交與吏部詳議康熙四十年十月十一日

諭大學士伊桑阿馬齊吳璵熊賜履學士辛保傅

紳來道范承烈曹鑑倫

直省地方料理事務必須簡任賢能爾衙門移文總督
郭琇張鵬翮桑格華顯巡撫彭鵬李光地噶禮徐潮凡
伊等所屬道員以下知縣以上官員有實心惠愛民生
居官清廉者雖有註誤降罰俱不必論著各具摺開送
內閣其別省官員內有伊等所灼知者即越省亦列名
奏聞康熙四十年十月二十五日

諭大學士伊桑阿馬齊吳璵熊賜履學士辛保傅

紳來道常壽來福范承烈曹鑑倫

陸漫閘西岸改築土堤內外鑲柴見今錢糧雖省但蘆
葦易致朽爛不能堅久二三年後又致重修張鵬翮在
任雖無可虞若張鵬翮離任或淮黃水漲有危險之處
鑲柴工程朽爛豈不更難著將此情節備寫差員往張
鵬翮處令其確議陳奏康熙四十年十一月十四日

諭大學士馬齊等

朕於科道官員許其風聞入告者端為廣開言路使自

督撫以下各官有一切事務任意妄為及所行貪劣致害民生者皆知所顧忌而警戒也科道官員糾叅不實例有處分又或言不合理及生事妄奏者外轉有之罷職亦有之至於被叅之人具疏回奏止應辨晰是非不應支離牽引因彼一身被叅而舉原叅者之父子兄弟親戚皆受指摘以逞報復則自此以後孰敢更糾一人頃左必蕃叅郭琇郭琇即將叅已之人轉行窮詰王材任叅高承爵高承爵即將王材任之父與其親戚妄意

牽連且如錢鈺曾叅原為巡撫穆爾賽在任貪婪及後
錢鈺授山東巡撫其居官並無勝於穆爾賽之處他若
此類者甚多彭鵬身為言官時亦曾叅人茲為王度昭
所劾理應止以切已之事剖晰奏明乃今訐奏王度昭
謂其曲庇親戚而其間所有夙怨又未指出實據彭鵬
雖操守清廉居官亦善所回奏反復瀆陳詞氣不勝忿
激凡在君上之前不應陳奏之言輒形於章疏粗戾已
極著以嚴旨傳飭之康熙四十年十二月十六日

諭大學士伊桑阿馬齊等

高家堰等處堤工雖竣然未遇大水俟來年經過水汛
之後方可驗其成功若爛泥淺一帶水出不暢則高家
堰究屬可憂向意欲徙武家墩出水此事尚須斟酌前
日問張玉書奏淮水尚高堰舊堤俱為湖水所浸據
此則泗州盱眙安得不被水災河身之淺深以洪澤湖
之高下為驗湖水低得一尺河身方深得一尺今洪澤
湖水比甲子年高有數尺可見河身未曾刷深高家堰

之堤恐過此以往尚未可知也張鵬翮請閱河摺子可
留內閣康熙四十年十二月十八日

諭刑部

朕欽恤民命念切好生每於法司奏上爰書必披覽再
三詳求可生之理其或情罪允符不忍立置之法者則
令監候緩決以俟來歲之再讞顧罪犯一經緩決即皆
冀望生全而長困拊揚淹留歲月自新無路朕甚傷之
今方春始和萬物暢遂憫茲沉繫之獄用沛矜釋之仁

現在爾部及直省監禁人犯凡經康熙四十年秋審奏
旨監候緩決者著察明通行減等發落仍開具人數奏
聞爾部即遵諭行特諭康熙四十一年正月二十四日

諭內閣

朕昔巡視西省地方聞葉九思居官甚優遂擢用為大
同府知府後因公墾誤部議革職朕特令罷職留任今
已歷數載其服官之善不改於前比來年齒亦漸長可
給還與原官諭吏部知之康熙四十一年二月初八日

諭戶部

朕躬理幾務年久深知稼穡之事念阜民之道期於有備去冬北地少雪今春雨澤微降尚未霑足誠恐蝗蝻易生有傷農事所在官吏亟宜先時預防直隸山東山西河南陝西江北地方歷年積貯倉糧果否足額該督撫宜確加稽核務使廩有餘儲不致匱乏其一切預備事宜須悉心講求料理縱年歲不甚豐稔亦可賑濟無虞至直隸各省現今雨澤有無多寡著該督撫即行具

摺奏聞以紓朕宵旰勤民之意爾部即遵諭行特諭康熙四十一年三月初十日

諭漢大學士九卿翰詹科道諸臣

尋章摘句華麗詞藻非帝王之所本朕四十餘年惟日兢兢未嘗晷刻稍釋萬幾自警有始無終之誚念茲在茲也政事稍暇頗好書射歷年以來所積臨摹字幅賜卿等觀看康熙四十一年四月

諭刑部

凡罪犯存留養親必其親係無罪可憫之人方可奏請
留養這案陳蒔生與其子陳潮同毆陳大生致死則陳
蒔生亦係有罪之人今將陳潮引存養例奏請於義不
合著再議具奏康熙四十一年四月十二日

諭大學士王熙

卿耆年舊德歷官最久自去歲告病在家朕無日不注
念老臣也近日九卿皆求扁額字對想卿身雖在告心
未嘗一時不在朝中故特書扁一面對一聯臨米芾書

一幅賜卿卿其勉強餐食輔以醫藥慰朕不忘舊臣之至意康熙四十一年四月二十三日

諭禮部

這訓飭士子文若令各府州縣學宮一體勒石恐有不產石州縣地方或致借端擾派著俟國子監勒石後以揭本彙頒各省轉發所屬各學康熙四十一年六月初一日

諭吏刑二部

金定四庫全書
卷二
黃梅知縣李錦部議仍准留任凡官員去留之權豈可
令百姓干預聚衆肆行之風亦漸不可長該督撫庸懦
無能平時不能約束軍民及至事出專務遮飾具題爾
部並不詳察止據所奏苟且議結殊屬不合李錦居官
雖優不可仍留黃梅縣任著令來京於直隸附近地方
員缺用康熙四十一年九月初九日

諭禮部

琉球國失水二人拯救復甦著地方官加意贍養俟便

船資給發還此等船隻損壞人被溺傷皆因修艖不堅所致嗣後琉球貢使回國時該督撫須驗視船隻務令堅固以副朕矜恤遠人之意康熙四十一年九月十三日

諭戶部

甘肅距京路途遙遠這茜草嗣後不必解送著該撫差官齎額設銀兩來京採買交納以紓民力康熙四十一年九月十三日

聖祖仁皇帝御製文第三集卷二

欽定四庫全書

聖祖仁皇帝御製文第三集卷三目錄

勅諭

諭大學士伊桑阿馬齊張玉書吳璵熊賜履

諭大學士伊桑阿馬齊張玉書吳璵熊賜履

諭山東省官員

諭扈從大學士張玉書直隸巡撫李光地

諭戶部

諭戶部

諭戶部

諭內閣

諭工部

諭大學士馬齊西哈納

諭都察院都御史六科給事中各道御史等

諭扈從大學士馬齊張玉書學士色德里劉光

美

諭戶部

諭山東巡撫王國昌

諭戶部

諭河道總督張鵬翮

諭河道總督張鵬翮

諭永定河分司齊蘇勒

諭河道總督張鵬翮

欽定四庫全書

卷三目錄

欽定四庫全書

聖祖仁皇帝御製文第三集卷三

勅諭

諭大學士伊桑阿馬齊張玉書吳璵熊賜履

總河請開邵家莊引河掘徐家莊河嘴等事若下部議
必致遲延著即照所題行朕觀永定河修築之法甚善
河身直河底深所以淤沙盡皆衝刷今治黃河亦用此
法方為有益此工多費不過十萬兩試照永定河法修

治之康熙四十一年九月十六日

諭大學士伊桑阿馬齊張玉書吳璵熊賜履

今所開陶莊引河甚善朕前巡視南河時曾令原任員外黑碩色將引河之椿加意深築其疏濬人字芒稻二河亦佳得此二河運河甚為有益朕觀明朝治河俱自徐州以上在河南地方修築我朝自康熙元年以來俱在徐州以下修築然治下流須預防上流若上流潰決下流必至壅滯嗣後徐州以上地方河臣亦當留意再

黃河之水遷徙無定朕前在寧夏時見黃河大溜每年
更移今年行溜在此來年又移他處其性如此況九河
故道原在河間地方後漸移向南歷代以來果能每年
防禦相機修理則河道何至如此大壞皆因時當多事
或十年或五年不修築不開濬所以漸難治矣明朝三
百年間嘗講求河工治法彼時措置亦得其宜如山東
微山湖將水蓄聚山中澇則蓄之旱則洩之皆深有益
於治河者也康熙四十一年九月十九日

諭山東省官員

爾等皆各有字頒賜不須求也爾等做官以清廉為第一做清官甚樂不但一時百姓感仰即離任之後百姓追思建祠尸祝豈非盛事從來百姓最愚而實難欺官員是非賢不肖人人有口不能強之使加毀譽爾等各宜自勉康熙四十一年十月十四日

諭扈從大學士張玉書直隸巡撫李光地

用儀器測量遠近此一定之理斷無差舛萬一有舛乃

用法之差非數之不準以此算地理算田畝皆可頃刻立辨但須細用工夫方能準驗大抵不離三角形耳三角形從前雖無此名而歷來算法必有所本如勾股法亦不離三角形是此法必自古流傳特未見於書故不知所始也康熙四十一年十月二十四日

諭戶部

今歲山東河南地方秋成俱報豐稔惟被災州縣民多匱乏頃朕巡幸至德州見有一二災民流移載塗者詢

問疾苦深為軫念雖據山東巡撫稱被災州縣已行令
地方官發粟散賑但自冬徂夏青黃不接之際頒賑不
繼無以資生應行山東河南兩省巡撫凡屬被災地方
令有司加意賑濟至明歲麥收時方止其災傷田糧雖
已照分數蠲免猶恐被災之後民力艱難宜更沛特恩
用加休養山東萊蕪新泰東平沂州蒙陰沂水河南永
城虞城夏邑被災州縣康熙四十二年地丁錢糧除漕
項外著察明通行蠲免該地方官務悉心奉行俾閭巷

窮黎均霑實惠以無負朕宵旰勤民殷殷軫恤至意爾
部即遵諭行特諭康熙四十一年十一月初九日

諭戶部

從來致治之道裕民為先故必蠲免田租時加減澤而
後閭閻充足永享樂利之休朕臨馭以來咨求民瘼蠲
賑頻施誠恐小民疾苦未蘇生業未遂用是宵旰靡寧
江北田土瘠薄生計尤艱朕心彌切軫念著將安徽巡
撫所屬府州縣衛等處康熙四十二年分地丁錢糧除

漕項外通行蠲免地方有司務要切實奉行俾小民得均霑實惠以副朕愛養黎元之意儻不肖官吏陽奉陰違或借端苛取澤不下究事發定從重治罪不宥爾部即遵諭行特諭康熙四十一年十一月初九日

諭戶部

朕撫御寰區四十餘年無一刻不以民生為念天下至大兆民至衆惟恐窮鄉僻壤百姓疾苦不能上達所以孜孜勤求未嘗少懈從來水旱自古有之備荒之法全

賴督撫得人儻以諱災為事虧空塞責一有歉薄莫知
所措視民命如草芥何以為民父母况秦省不通水運
若不謹於蓋藏儉歲難於賑卹河西一帶地方素稱貧
瘠雖免四十一年錢糧民生未裕再將四十二年地丁
錢糧通行蠲免該督撫遍示所屬地方務使閭閻均霑
實惠以副朕惠愛元元之至意如有不肖有司違旨私
徵希圖侵蝕者督撫察叅從重治罪或被旁人告發或
被科道糾劾該督撫一併嚴議特諭康熙四十一年十

一月初九日

諭內閣

近見各部院衙門或所辦事件有錯誤者惟恐事情覺露專務隱匿不行檢舉朕一日二日總理萬幾亦止詳識緊要事務安能逐事一一記之各部院檔案繁多勢不能無舛錯遺漏或有舛錯遺漏而即自行檢舉則其過猶為可恕若懼罪隱匿不行檢舉則事必終於舛錯所貽悞甚大爾等將此旨傳諭各部院滿漢大臣知之

康熙四十一年十一月初十日

諭工部

禹陵殿宇應即行修葺著交與杭州織造教佛和令確
估工價動支織造節省銀兩會同地方官盡心料理稱
朕尊崇前代聖王之意康熙四十一年十一月二十六
日

諭大學士馬齊西哈納

原任侍郎額星格前因累誤革職非有大過今年已衰

老朕比來巡歷所至凡此等星誤罷閒年老官員在籍者皆給與原官職銜以示優遇老臣之意額星格著以原銜給之康熙四十一年十二月初六日

諭都察院都御史六科給事中各道御史等

朕即位四十餘年未嘗少刻不以民生休戚為念遠邇安靜為本雖或慶雲景星嘉禾瑞草天書麟鳳之奇總無關於黔黎亦無關於朕心反為史書之譏朕以實心為民天視天聽故有其道難免後人公論若耀功德取

一時之虛名朕之不悅甚矣毋煩數陳康熙四十一年十二月十六日

諭扈從大學士馬齊張玉書學士色德理劉光美司業降調劉芳喆請安來朝朕見其年邁心甚憫之彼係舊翰林可傳諭吏部復其所降原級康熙四十二年正月十七日

諭戶部

朕甲子己巳兩次南巡路經東省見民生豐裕士庶共

慶近來淮黃告成朕不辭遠涉減從輕行待旦而興夜
分乃寐再經齊魯存問民生休戚似不及甲子己巳朕
深憚怛痼瘵之在抱也若閭閻蓄積有餘即遇有水旱
亦不致困苦今特加恩蠲恤用宏愛養朕所經過地方
德州平原禹城齊河歷城長清恩縣夏津武城館陶臨
清清平博平堂邑聊城東阿陽穀壽張滕嶧二十州縣
康熙四十一年未完地丁錢糧著通行蠲免濟南府屬
之海豐利津霑化兗州府屬之寧陽滋陽泗水金鄉單

曹鄆城曲阜費十二州縣去歲農收歉薄四十一年未完錢糧亦通行免徵其去歲曾被水災者東平新泰蒙陰沂州沂水萊蕪六州縣康熙四十二年地丁錢糧已經全免外四十一年未完錢糧亦俱著全免其泰安鄆城魚臺汶上嘉祥鉅野濟寧七州縣雖未成災四十一年未完錢糧俱著蠲免四十二年地丁錢糧著分三年帶徵爾部即移文該撫董率各州縣有司詳慎奉行務令人需實惠戶有餘藏以稱朕重期黎元殷阜之至意

有不肖官吏侵蝕私徵者察出定從重治罪爾部即遵諭行特諭康熙四十二年正月二十六日

諭山東巡撫王國昌

朕自泰安州見新泰蒙陰沂州郯城等處城郭鄉邨黎民被災甚苦雖將正賦蠲免而方在乏食尚屬無益徒有賑濟之名而倉粟諒已盡竭又觀黎民顏面衣服深為可慮朕懷不勝憫惻更為盡心籌畫欲救民急固屬甚難如以養濟蒙古例施於山左庶幾青黃不接之際

猶可度日命在京滿漢大學士九卿會議無論官民有情願効力者作速遣往山東不拘銀米同地方官分界賑濟以及降級革職人等有情願贖罪者亦准其贖罪俟秋成後視其果有裨益酌量議叙已有諭旨該撫同爾屬員善為撫綏勿致流離失所務期副朕視民如子之至意即將告示刊刻通行曉諭特諭康熙四十二年二月初一日

諭戶部

朕經過泰安州新泰縣蒙陰縣沂州郯城縣等處見民有饑色應急行振救所過地方雖經賑濟蠲免錢糧但州縣倉穀年久朽爛無裨於散賑今著將總漕桑格漕米內二萬石交與總河張鵬翮揀選賢能官員運至濟寧州兗州府等處州縣減價平糶有應賑之處即行賑濟亦交米二萬石與桑格於泰安州一路散給又將收稅有力之官七員並發在京旗民贖罪人一百名令伊等俱照養蒙古例以所用之多寡分別議叙康熙四十

二年二月初二日

諭河道總督張鵬翮

仲莊閘清水出口逼溜使南恐運口有礙應從陶家莊
以下楊家莊處開挑引河令中河之水由此出口方於
運口有益楊家莊雖地勢低窪然即使倒灌亦不過一
二里清水仍然頂出可即相度形勢估計奏聞仲莊石
閘工著暫停康熙四十二年二月初四日

諭河道總督張鵬翮

煙墩甚險雖有越堤必須保守縷堤此處挑水壩應行
建築挑源煙墩至龍窩一帶堤工卑矮俱應加高康熙
四十二年二月初四日

諭永定河分司齊蘇勒

朕觀黃河險要地方應下挑水埽壩現今永定河朕親
指示挑水等工俱有裨益爾遵照朕指示式樣前往煙
墩九里岡龍窩三處築挑水壩數座試看有無裨益雖
被衝壞無妨工完之日令該地方官盡心防守如有墊

陷不時修葺可將此旨傳與總河張鵬翮速派賢員令其多備物料夫匠於朕回鑾之前完工需用錢糧與爾無涉不可經手工完將用過錢糧記明具奏如遇挑汛水發即行停止康熙四十二年二月初五日

諭河道總督張鵬翮

歸仁堤引河用以分洩洪澤湖水勢若黃水加長則恐清口水弱著將祥符閘下板堵閉草壩將五堡閘應酌量開放以助清水之勢又禹王臺沭水由沭陽入海沭

河淤墊之處應勘明即行疏濬康熙四十二年二月初五日

聖祖仁皇帝御製文第三集卷三

欽定四庫全書

聖祖仁皇帝御製文第三集卷四目錄

勅諭

諭河道總督張鵬翮

諭偏沅巡撫趙申喬

諭扈從大學士馬齊張玉書學士色德里劉光美

諭扈從大學士馬齊張玉書學士色德里劉光

美起居注揆敘滿保

諭河道總督張鵬翮

諭河道總督張鵬翮

諭河道總督張鵬翮

諭河道總督張鵬翮

諭內閣九卿等

諭內閣

諭工部

諭禮部

諭內閣

諭戶部

諭大學士九卿詹事掌印不掌印科道等官

諭戶部

諭戶部

諭東省在京官員

諭兵部

諭內閣部院等官

欽定四庫全書

聖祖仁皇帝御製文第三集卷四

勅諭

諭河道總督張鵬翮

此間邵伯更樓地方舊日被災形狀與山東饑民無異
宣朕今日觀此地安居景象而忘山東之饑民乎朕念
運糧賑濟事不可緩乘今日順風爾作速回清江料理
轉運截留漕糧差官前往山東散賑至距揚州十五里

沙壩橋河道情形朕自細閱回鑾時面諭爾知之康熙四十二年二月初七日

諭偏沅巡撫趙申喬

湖南地方介在邊遠之境聞向來官吏積習相仍無藝私征種種不一計每歲科派有較正供額賦增至數倍者有司徵收錢糧加取火耗又視別省為獨重百姓窮蹙不支致多流離轉徙非將宿弊逐一剔除無以砥礪官方大甦民困除從前已往諸事姑免察究外爾到地

方嚴飭大小屬員痛改前非洗心奉職力減加耗盡革私徵務使流移者復返鄉閭守業者獲安隴畝庶副朕軫念遠省民生至意如仍有藐法不尊重為民害者即據實糾叅從重治罪決不輕宥特諭康熙四十二年二月十二日

諭扈從大學士馬齊張玉書學士色德里劉光美趙申喬分文不取信然但朕至杭州諮訪百姓言趙申喬好收詞訟民多受累大凡居官固貴清廉尤必和平

乃為盡善。如果好收詞訟，刁民興訟者必多。縱使即為審理，其被訟之人一家產業已蕩然矣。如此民何以堪。聞阿山亦喜受民詞，總之為督撫者務以安靜不生事為貴耳。康熙四十二年二月二十日。

諭扈從大學士馬齊、張玉書、學士色德里、劉光美起居注揆敘、滿保。

凡人告訐之言，未可盡信。朕所見事多矣，試舉一事。爾等共聽之。昔年朱瑪喇奉命往擒于七時，阿哈碩色曾

以司官同往忽有一人出首于七隱匿在彼邨中大兵
即往圍其邨邨民不納知縣窘甚裸體入邨謂衆人曰
以爾等隱藏于七是以大兵來圍爾等可速將于七送
出邨人曰邨中實未藏于七如不信試遣人入搜之大
兵入邨徧搜果無于七首告之人即指邨中一生員曰
此即藏于七之人也朱瑪喇遂執而殺之首告之人乃
笑而言曰此人並未藏匿于七實與我有仇是以告之
今既殺之我願畢矣縱殺我亦無怨朱瑪喇憤極又執

首告之人殺之人情之可恨如此彼時知縣身亦受傷
無辜百姓亦有被殺者阿哈碩色曾向朕泣奏此事夫
害人者身受顯戮宜矣而無辜之人橫罹荼毒曾謂告
訐之言可輕信乎康熙四十二年二月二十二日

諭河道總督張鵬翮

王公堤關係運道民生最為緊要堤岸單薄椿工漸朽
應再加幫以資捍禦不可因淤灘可恃而忽之也康熙
四十二年三月初二日

諭河道總督張鵬翮

高堰工程關係重大保守最為緊要朕今日乘舟由洪澤湖閱視見有殘缺石工以葦草鑲填儻遇水發危險堪虞至六壩見新修石壩堅固方慰朕懷其殘缺石工著即興修乘水未長之前完工用資捍禦至高家堰防險之人用候選縣丞經歷等微員此不過例監書辦出身家產微薄儻有疎忽干係不小須於候選官員內擇其職銜稍大身家殷實者委令防險如此則彼知自愛

身家又有選用之望自然盡心防守有裨工程康熙四十二年三月初三日

諭河道總督張鵬翮

王家營對面鮑家營應開挑引河洩黃河汎漲之水以保障清江淮安地方著即行興工仍兩岸築堤以衛民田康熙四十二年三月初三日

諭河道總督張鵬翮

清口西壩乘此水淺時再加長數丈有益又半路劉河

流埽灣堤岸單薄應築挑水壩康熙四十二年三月初四日

諭內閣九卿等

朕此番南巡徧閱河工大約已成功矣曩時總河于成龍不遵朕指授修築故未能底績今張鵬翮一一遵諭而行是以成功向來黃河水高六尺淮河水低六尺不能敵黃常患淤墊今將六壩堵閉洪澤湖水高力能敵黃則運河不致有倒灌之患此河工所以能告成也朕

自御極以來無時不以民生為念雖纖悉之事不肯怠忽今四十餘年矣四海乂安民生富庶河工適又告成朕欲頒詔天下大加恩賚故星夜回鑾詔內款項爾等可會同詳閱有應增入者即議增入康熙四十二年三月十六日

諭內閣

頃朕往察河工原任侍郎任克溥於山東途次迎駕見其年將九十現在諸臣未有如其久者朕深為眷念著

加刑部尚書銜以示優遇老臣至意可諭吏部知之康熙四十二年四月二十三日

諭工部

王起元等工程既竣著令回京張鵬翮疏內稱高承爵工尚未完朕今歲南巡徧閱河工見高承爵所修工程水深成潭難於修築高家堰所關甚要儻工程有悞縱重治高承爵罪於事何益著移文總河張鵬翮如此處可修則另派委賢能官修築如不可修則宜另築越堤

所用錢糧仍令高承爵發給康熙四十二年五月初四日

諭禮部

國子監文廟現勅廣善庫官員動帑修理順天府學尊經閣等處亦著一併督修用宏文教康熙四十二年五月十九日

諭內閣

各省督撫俱係朕簡用之人今以督撫所舉劾人員復

行更張令九卿詹事科道逐一稽察能保九卿詹事科
道比督撫盡皆公正耶若此反多夤緣將益增紛擾許
志進條奏必有情弊所請不准行下所司知之康熙四
十二年五月二十三日

諭戶部

洪澤湖水勢洶湧更甚於大江黃河之水這失風漂沒
漕糧准從寬豁免嗣後糧船經行洪澤湖失風者著照
大江黃河漂沒例定議奏聞康熙四十二年七月十五

日

諭大學士九卿詹事掌印不掌印科道等官

六月內因有二王之事朕心不勝悲慟至今猶未釋然
又兼災祲頻告愈加憂鬱身體不安頃往坐湯泉始得
稍解仍未全愈至於饑民救養之計未嘗時刻不厯於
懷近有李煦人來詢知郟城至泰安田穀稍有可望由
泰安至德州被災甚重今歲口外田穀大收口內各處
田禾俱屬平常合共計算所糴之穀必不能多今應將

漕糧多行截留於山東沿河州縣邨鎮有名馬頭俱各存貯其捐納事例雖廣行無濟於事且日後必至紊亂東省人民現今乏食總使行此數事民有大半至於逃亡朕意八旗滿洲蒙古漢軍佐領一千有餘每三佐領下共出一人可得三百人每三佐領借與銀三千兩餘外捐助車輛駱駝頭口分派各州縣仍照前去人員養至來年七月及今八月內可以到彼況前往撫養地方民人甚有裨益今雖疊被災傷民人仍帖然未動此即

有益之效也這事情爾等可確議至東省今歲錢糧漕米俱應速行停徵著議奏為此手書特諭康熙四十二年七月二十七日

諭戶部

賑濟東省饑民事關緊要應差大臣分為三路每路差大臣一員將先派去人員一併往返巡察於事有益自泰安至郟城為中路著穆和倫去自濟南至登州為東路著辛保去自德州至兗州東昌濟寧為西路著卞永

譽去截留漕糧關係緊要總漕桑格現今無事令作速前來親看截留其賑濟饑民人員所領雖係公物而勉力自効有濟於民事成回時著一併議叙康熙四十二年八月初二日

諭戶部

邳州等處地方屢被災傷不減於東省但尚有水路可通著該督撫親往察閱應作何速行拯濟一面頒賑一面奏聞俟具題到日將應蠲豁錢糧另議具奏康熙四

十一年八月初四日

諭東省在京官員

朕四次經過山東於民間生計無不深知東省與他省不同田間小民俱依有身家者為之耕種豐年則有身家之人所得者多而窮民所得之分甚少一遇凶年則已身並無田畝產業有力者流移於四方無力者即轉死於溝壑此等情狀爾東省大臣庶僚及有身家者亦當深加體念似此荒歉之歲雖不能大為拯濟若能輕

減所入田租以各贍養其佃戶不但深有益於窮民即爾等田地日後亦不致荒蕪如果民受實惠豈不勝謝恩千百倍耶這奏謝已悉所司知之康熙四十二年八月十一日

諭兵部

現今頒發特旨遣養饑民則閭閻小民斷不致有復為盜賊肆行搶掠之事今若特撥兵丁增設於各要路則兵丁食何糧饟以資防守兵丁無糧仍必致於擾民爾

部並不詳加籌畫即議將李登瀛條奏准行殊屬草率
況地方設立官兵原以衛民其地之遠近衝僻分晰甚
明今並未議撥何地兵丁駐於何處又稱官兵應不時
出海巡察防緝盜賊並未指令坐何船隻用何處水師
殊屬糊塗著再確議以聞康熙四十二年九月十一日

諭內閣部院等官

朕因山左災荒勞心殫思屢行諮訪山左歲歉非止今
歲為然地方官歷年隱匿不報今春朕因閱視河工親

見災黎情形始行籌畫賑濟今歲田禾雖云失望尚有薄收之處巡撫布政使為伊等素有欠缺欲巧圖完補故甚其詞以奏報又夤緣科道紛紛急奏言盜賊蜂起人民相食私冀或開事例或撥銀兩因於其中侵蝕託言賑濟而實欲完補虧空以施鬼蜮之謀也朕幾墮其術中今京師遣往三路賑濟人員俱掣簽派撥州縣並不分成災與否一槩散賑遣去人員未奉有稽察諭旨惟視巡撫布政使所指地方賑濟應將此事交與三路

大臣加意稽察至於條奏盜賊蜂起人民相食之員亦當明白詢問如盜賊蜂起必有殺人放火搶奪財物糧米之處與失事之人如人民相食亦必有被傷之人與食人之人如有不實即為巡撫布政使急請設發銀兩而言也大學士九卿諸臣會同議奏言官並不實心為民專為巡撫布政起見不誠可愧乎康熙四十二年九月十四日

聖祖仁皇帝御製文第三集卷四

欽定四庫全書

集部

聖祖仁皇帝御製文第三集卷五至七

臣永瑤恭校

侍讀臣孫球覆勘

覆校官中書臣龔禔身

校對官主簿臣郭祚熾

謄錄貢生臣郭璜

欽定四庫全書

聖祖仁皇帝御製文第三集卷五目錄

勅諭

諭兵部

諭內閣兵部

諭吏部

諭大學士馬齊席哈納張玉書吳璵陳廷敬等

諭吏戶兵三部

諭大學士馬齊西哈納張玉書吳璥陳廷敬學

士常壽色德里滿丕趙士芳王九齡曹鑑倫

諭武殿試讀卷官

諭奉命撫苗尚書席爾達等

諭大學士馬齊張玉書吳璥陳廷敬

諭工部

諭戶部

諭吏工二部

諭大學士馬齊等

欽定四庫全書

聖祖仁皇帝御製文第三集卷五

勅諭

諭兵部

山東地方稱有海賊坐鳥船二隻行劫朕思山東地方
雖下諭旨令造鳥船亦必從福建浙江江南成造而來
若不知山東不能造船如何辦事歷年福建商船於六
月內到天津候十月北風始回朕因欲明晰海道令人

坐商船前往將地方徑路繪圖帶來知之甚悉今欲知
海賊之源但令往福建浙江及江南崇明等處察訪即
得之若在山東察訪必不能得目下冬令將屆正值北
風海賊不能久留於直隸山東必已向浙閩路去俟明
歲船隻可行時下旨於有水師海船之省令入各海島
搜剿將此旨識之俟回京日啓奏康熙四十二年九月
十五日

諭內閣兵部

紅苗事當籌一勞永逸之計苗人固慣行搶掠而因內地人勾通煽誘者亦有之今照廣東八排瑤人事遣大臣一員前往領荊州兵再酌派廣西湖南貴州三省兵齊至苗地協力圍困令其畏懼就撫則百姓可永免侵掠之患至山東所有海賊必係福建浙江崇明等處坐鳥船而來者若不將賊數多寡及嘯聚何地出沒何路詳悉周知難以料理應遣大臣一員前往招撫先招撫一二起細詢夥盜確數如何嘯聚並何處屯住何路出

入一一明晰則餘賊或剿或撫無難矣俱交部詳議康熙四十二年九月二十四日

諭吏部

閱此疏內有請禁督撫建德政碑等語凡地方大小官吏若居官果優縱欲禁止百姓立碑亦不能止如劣跡昭著雖強令立碑後必毀壞聞昔日屈盡美為廣西巡撫回京時百姓持鋤概鋤其馬跡庶民之心豈能強取耶禁立碑一段可刪去康熙四十二年九月二十六日

諭大學士馬齊席哈納張玉書吳璵陳廷敬等

江南督撫提督著公同捐造洋船二十隻俟來年春令
山東水師營官兵前往江南取至山東候用目前山東
海盜非真正海中積賊皆貿易之人資本虧折肆行搶
奪者可令學士常壽前往招撫再令筆帖式三人往山
東三路問賑濟事並視民間情形限第六日到京朕自
幼聽理政事極其敬謹時時惕厲於心今已年艾諸事
更加戒懼不敢稍有懈惰忽略也康熙四十二年十月

初二日

諭吏戶兵三部

朕統御寰區勤求治理鑒與時邁省方觀民春月閱視河工自畿輔山東以及江浙地方皆經巡幸茲兩河漸已底績所至之地民生風俗亦因以周知念陝西省為巖疆重地當出師塞外時曾經歷其邊境而西安一路未及親蒞頃陝西督撫諸臣言秦民望幸之心至殷且切合詞陳奏而河南山西巡撫等亦諄切具請乘此冬

令農隙之際觀覽民風詢察吏治簡閱禁旅整飭軍營
實為要務用是輕裝約從諏吉西巡沿途一切供御皆
內廷儲備纖毫不取辦於地方即偶有市易之物亦勅
所司依時價給值不許錙銖抑勒所過大小官吏宜體
朕愛民德意勿借詞供億私派閭閻如有悖旨科斂者
察出即以軍法從事地方官不許與扈從人員指稱交
戚私相餽遺違者並以軍法從事其扈從人員宜約束
僕役勿使妄行如不遵法紀生事擾民一併從重治罪

朕視民如子凡乘輿所至市廛隴畝宜各安生理米豆
薪芻等物民間照常貿易不必禁止惟懷私挾詐衝突
告訐者所告事不與准理仍嚴加治罪爾等即傳諭扈
從官員人等並行各督撫令於經過府州縣城市邨莊
徧示曉諭俾咸悉朕懷特諭康熙四十二年十月初五
日

諭大學士馬齊西哈納張玉書吳璵陳廷敬學士
常壽色德里滿丕趙士芳王九齡曹鑑倫

古北口總兵官馬進良宣化府總兵官尚宣居官甚優
人才亦壯健皆堪任提督之員但因南方暑熱不宜年
老之人故未陞授此職向有以提督銜管總兵官事之
例著兵部察例以聞康熙四十二年十月初六日

諭武殿試讀卷官

武進士中原有人才朕意欲廣武會試中額以示鼓勵
文官不許本籍為臨民之官武官須習知本地形勢方
有益國家所最重者邊疆簡用武臣大有關係兵可百

年不用不可一日廢兵今承平日久從前老於行間之戰將漸次彫零昔之海上投誠者習於水戰今亦不可多得矣初議取臺灣時都統喇哈達以為斷不能取而施琅獨任之遂爾成功此後若有疎虞欲再取難矣海上行舟與江湖不同江湖之中雖能習於水戰用之海上必不相宜沿邊一帶邊將尚可得人此後水師切宜加意康熙四十二年十月初六日

諭奉命撫苗尚書席爾達等

凡事同心協力則無不成不和則事無一成且行兵立營須用怯遇敵對壘須用勇又以機先為要儻臨事時疑慮不定必致有悞尔等當以果毅行之如苗人歸降止誅倡亂肆虐之人否則殲其抗拒不服者毋得玉石不分僂及無辜我滿兵以力勝者多此行須用計招撫委婉從事勿徒恃勇力至於立營必擇高阜處設立前朕在寧夏時審度時勢多方調度是以錢糧不耗費兵民亦無苦累此皆在主將之巧於設施耳荊州副都統

朱滿湖廣提督俞益謨俱矯健久於用兵可與伊等商酌而行提督李芳述張旺行間効力處亦多土司田舜年前於雲南用兵時輸誠協濟甚有裨益此去可獎厲用之苗人歸附後探其巢穴仍加謹慎隄防不可以彼歸順遂輕忽視之康熙四十二年十月初六日

諭大學士馬齊張玉書吳璥陳廷敬

朕觀河道已治總河張鵬翮及河工官員俱甚効力黃河一切工程朕知之最悉先是永定河用埽大有裨益

是以朕諭張鵬翮黃河亦宜用埽張鵬翮回奏永定河
勢小可以用埽黃河勢大難以用埽朕云姑試用之且
所費錢糧無幾張鵬翮因而用埽河堤今果堅固矣至
於洪澤湖水勢甚險堤岸復高往來舟楫一遭漂沒人
命輒難救援朕曾諭河官張弼李梅於沿湖坡將長木
椿斜釘於水中船雖漂沒人尚可以攀援獲命張弼李
梅俱以朕諭為是俟於釘椿木後驗之康熙四十二年
十月初七日

諭工部

覽河臣奏中河之水由楊家莊開河出口清水暢流敵
黃舟楫通行高家堰六壩及各處工程俱保固平穩海
口大通河底日深去路甚速淮水暢出黃水絕無倒灌
之虞下河等處窪下之區俱得田禾豐收民居安晏所
報秋汛水勢已悉所司知之康熙四十二年十月初八
日

諭戶部

山東省去歲農收各州縣豐歉不一今春朕南巡過山東時已分別被災輕重蠲免錢糧並遣効力人員星馳賑濟比及回鑾東省又告潦災朕宵旰軫懷悉心籌畫截留漕糧平價發糶兼出帑金遣八旗人員分道散賑仍於三路各遣大臣經理所在饑民庶得資以全活不致仳離失所猶念被災之後民力未紓宜更加德澤以宏休養康熙四十三年地丁銀米著通行蠲免有積年錢糧拖欠在民者亦著察明免徵行文該撫率所屬有

司詳慎奉行務令人霑實惠有違旨私徵者察出定從
重治罪仍令各州縣徧示曉諭俾窮鄉僻壤咸悉朕惓
惓惠愛災黎至意又朕南巡回京原擬蠲浙省明歲錢
糧茲因東省災傷先行蠲免其浙省錢糧俟至明歲另
頒諭旨尔部即遵諭行特諭康熙四十二年十月初十
日

諭吏工二部

黃淮兩河關係運道民生最為重要朕念治河國家大

事夙夜厯懷未嘗少釋披圖咨衆雖已悉其源流顧水
勢變遷不常必眞知洞晰方可實見施行是以不憚勤
勞屢親巡閱察其險易之形勢審其疏導之機宜緩急
次第具有成畫至於簡命河臣倚任甚切凡所屬官吏
皆聽選用大修工程費以數百萬計歲修帑金亦以數
十萬計乃康熙三十七年黃淮並漲總河董安國不堅
築堤堰疏通海口因而河身墊高溢出河岸以致倒灌
洪澤湖口湖水從六壩旁洩由運河入下河淹沒民田

於是罷董安國以于成龍代之朕隨授以治河方略詳加指示三十八年親往閱河駐蹕清口河干又面諭于成龍清口宜築挑水壩挑黃水使趨北岸方可免倒灌清水之患隨指定其地再三申命于成龍不遵朕旨致無成功及用張鵬翮為河道總督面諭云頃已發帑數百萬令大臣官員往高堰築堤閉六壩使逼洪澤湖水暢出清口而清口築挑水壩尤為緊要此壩不築則黃水頂衝斷不能使向北岸湖水必不得暢流張鵬翮遵

奉朕言壩工築成黃溜遂直趨陶莊清水因以直出疊
經伏秋大漲並無倒灌之事其浚張福口等引河築歸
仁堤疏人字芒稻涇澗等河開大通口皆遵朕旨一一
告竣今年春朕閱河至桃源見龍窩等處頂衝危險命
增築挑水壩比壩工刻日訖事河勢遂平中河仲莊開
口以與清口相對特命改由楊家莊漕輓安流商民利
濟曩時黃水泛漲或與岸平或漫溢四出今黃河深通
河岸距水面大餘縱遇大漲亦可無虞矣張鵬翮所修

工程雖悉經朕裁斷而在河數載殫心宣力不辭艱瘁
又清潔自持一應錢糧俱實用於河工無纖毫浮耗朕
心深為嘉悅所屬大小河員並皆勉力赴工共襄河務
亦屬可嘉自總河以下各官爾二部即詳加議叙具奏
特諭康熙四十二年十月初十日

諭大學士馬齊等

朕聞山東巡撫布政使將賑濟饑民人員帶去銀兩俱
收貯布政司庫內至今猶未散給若此則賑濟饑民之

事不致遲悞乎此項銀兩俱係自京帶往並非伊等庫內之銀且前往人員皆三牛录會同保出賢能有身家之人伊等但當察所養饑民之優劣至於耗費儉用銀兩之處俱係派去人員之事與伊等何涉而將此銀收貯至今仍不散給必待饑民逃散之後始行賑濟耶此係何心朕不得知是又劉愷之計也况派去三百餘人員不作速分派地方俱令久住濟南勢必至於無所餬口尔等交部作速移咨詢問王國昌等康熙四十二年

十月二十二日

聖祖仁皇帝御製文第三集卷五

欽定四庫全書

聖祖仁皇帝御製文第三集卷六目錄

勅諭

諭山西巡撫噶禮

諭散秩內大臣公傅爾丹

諭兵部

諭禮部

諭川陝總督華顯陝西巡撫鄂海甘肅巡撫齊

世武

諭河南巡撫徐潮

諭大學士馬齊席哈納張玉書吳琬陳廷敬學

士色德禮鐵圖滿丕阿蘭泰趙士芳王九齡

曹鑑倫徐秉義

諭吏禮二部

諭吏部

諭刑部

諭戶部

諭工部

諭起居注官揆敘海寶

諭大學士馬齊起居注官滿保海寶

諭欽天監

諭兵部

諭戶部

諭戶部

欽定四庫全書

聖祖仁皇帝御製文第三集卷六

勅諭

諭山西巡撫噶禮

朕君臨天下四十餘載無一刻不以蒼生為念近因西省望幸甚切故於冬時農隙減從輕騎由晉以及秦入境以來觀風問俗見官方微有廉風民生略有起色閭閻之間俗樸尚儉朕心少慰朕自弱齡讀書往往以不

知窮簷僻壤之疾苦為歎息所以留心於官方吏治凡有來往者必先諮詢民情豐歉偶有失時定加蠲賑且思晉省不通水運歲或不登即難籌畫雖有州縣存貯之穀米未必實數具在反益不肖有司之虧空也今歲山西收成頗佳爾等仰體朕愛民如子之至意曉喻民間若豐歲用奢則荒年必致匱乏教以禮義導以守法重農務本藏富於民則朕無西顧之憂矣凡朕所經之處必大沛恩澤因今歲東省災甚已蠲四十三年地丁

錢糧又免雲貴廣西四川地丁錢糧所以不能施惠但將四十二年以前山西所屬州縣未完銀兩米草盡行蠲免以示朕加惠黎元之念爾等即遵諭行特諭康熙四十二年十月二十六日

諭散秩內大臣公傅爾丹

今日閱射時兵丁所乘馬驚逸漸近御仗諸年少大臣俱效年老大臣旁觀不動惟爾直前勒止之可謂繼武前人矣特賜爾貂皮褂一領嗣後益加勉力勿以身為

大臣而不思奮力向前也康熙四十二年十月二十九

日

諭兵部

朕巡歷諸省觀綠旗兵丁無如提督潘育龍之兵者射
既熟嫻人復勁健此皆統率將領之訓練有方也自提
督以下官員可俱加一級康熙四十二年十一月十三
日

諭禮部

周文王武王古之聖君非他帝王可比向以孔子聖人已書名致祭矣此祭文內亦應書名康熙四十二年十一月十六日

諭川陝總督華顯陝西巡撫鄂海甘肅巡撫齊世

武

朕撫有區夏思臻上理期於舉世乂安宵旰勤勞未嘗少釋而秦省為天下要地時屢朕懷曩者連歲荒旱所司未經奏報朕訪聞得實即多方籌畫運米拯救一由

襄陽運至商州一命河臣由黃河運至潼關一由湖灘
河朔運至渭河一由甘肅運至西安分行賑濟蠲賦已
責安集流離秦民始得少蘇自康熙三十二年遣皇長
子致祭華山以來雨暘時若年穀豐登閭閻微有起色
但秦省關係最重且不通水運撫綏尤宜加意故不憚
隆冬跋履風霜遠臨茲土見百姓歡迎載道且知今歲
有秋地方文武官吏能恪勤奉職滿漢軍士亦皆訓練
有方朕心甚慰凡巡幸所至必大沛恩膏今將陝西巡

撫及甘肅巡撫所屬地方康熙四十二年以前各項積欠銀米草豆錢糧盡行蠲免俟四十三年直隸各省咸獲豐稔當將秦省四十四年正供亦行免徵該督撫即通行曉諭俾窮鄉僻壤小民均霑實惠儻不肖有司希圖侵蝕以致澤不下究該督撫嚴加訪察據實指叅以副朕愛養黎元之至意爾等即遵諭行特諭康熙四十二年十一月十七日

諭河南巡撫徐潮

朕念西土兵民生計乘冬令農隙之時特事西巡返轡
京師道由豫省自入潼關見閩鄉以及河南府民生甚
艱而懷慶稍裕至衛輝府則又艱苦賴薄有秋成尚能
餬口儻遇歉歲必至流亡此皆大小官吏互相容隱雖
有衰老病廢懶惰退諉之員仍使在任以故貽誤地方
河南百姓質朴愚魯輸賦從未稽遲而今歲所欠乃至
四十萬兩顯係有司聞朕蠲除秦晉積欠錢糧希冀恩
免而於中漁利現今民欠甚多俱免催徵著將河南通

省官俸役食補足所欠之數如有不完停其陞轉俟完日開復特諭康熙四十二年十二月初六日

諭大學士馬齊席哈納張玉書吳璵陳廷敬學士

色德禮鐵圖滿丕阿蘭泰趙士芳王九齡曹鑑

倫徐秉義

朕頃巡幸西省閱汾渭二水俱屬大河直與黃河相通河南等處米穀似可由黃河轉運但聞三門砥柱水勢極溜船不能上朕欲往親閱因陝州知州秦無路徑斷

難行走遂未果行特命三貝勒同近御侍衛往視據回
奏言伊等遣人乘騎涉河一道閱有神人鬼三門俱係
鑿石開通水從三門流出其勢甚寬其流甚急古人於
崖上鑿有曳船眼孔但未經以船驗試不知可否行走
前總河靳輔亦曾奏黃河通於汴河但淤墊年久若行
疏導即可運糧朕至河南閱河南府居各省之中水路
四達最為緊要之地應於此處儲積米穀每年田畝豈
能必皆豐收儻山陝等省間或收成歉薄即可將此積

貯米穀修造船隻由黃輓運若到三門砥柱船不能上
亦可於三門砥柱造船剥運以至山陝誠使河路疏通
則商賈人民大有裨益所宜於無事之時預為籌畫者
也豫省每年解京漕糧二十萬石有奇若將豫省三年
漕糧截留備用則陝西等省雖值歉收之年將此米穀
運至彼處賑濟殊屬有益俟明歲再遣大臣往視康熙
四十二年十二月二十日

諭吏禮二部

華顯自簡任總督以來潔已率屬綏輯地方秦蜀兩省
事務料理合宜才猷茂著頃朕西巡秦省滿漢文武官
吏軍民無不稱舉其賢忽聞患病溘逝朕心深為軫悼
應加贈職銜宮保著議奏仍加祭一次康熙四十三年
正月二十二日

諭吏部

教職官員必文義明通方稱厥職近見直省教職官內
不諳文義者甚多如此何以名為師儒訓迪士子著行

文直省巡撫將各屬教職通行親試分別具題嗣後俱照此例不時考試康熙四十三年三月十一日

諭刑部

朝鮮國王李焞敬慎夙著其國人越境行劫隨經捕獲監禁奏請勘斷此案不必復遣大臣前往察審可即令該國王審明擬結具疏奏聞康熙四十三年四月初十日

諭戶部

山東省昨歲歉收若將河員俸工銀兩解往山東買穀則穀價必致騰貴江南產米之地又水路易於輓運著總河張鵬翮等即從江南購買穀石運至東省交倉還項康熙四十三年四月二十日

諭工部

楚省地方緊要屢次出征盈甲損壞是實提標兵丁所需盈甲勅行江南江西總督將伊標下兵丁盈甲內擇其佳者照數解給楚省仍著該督捐造補額湖廣提督

等官不必捐造康熙四十三年五月初一日

諭起居注官揆敘海寶

古人講道學者甚多而尤好非議人彼亦僅能言之耳
而言行相符者蓋寡是以朕不尚空言斷不肯非議古
人何以言之凡人各有短長棄短取長始能盡人之材
若必求全責備稍有欠缺即行指摘此非忠恕之道也
故孔子當時惟節取人之善隱諱人之短凡事求諸已
並不非諸人是豈可少容私意於其間乎又人見講道

學之空言輒為之太息以為若等何不見用果見用必有可觀此亦徒見其空言而云然也若果見用言行亦未必相符惟宋司馬光編輯資治通鑑論斷古今盡得其當而後之論者反未嘗置諸講道學之列司馬光乃宋朝名相言行相符由此以觀不在空言也故君子先行後言果如周程張朱勉行道學之實者自當見諸議論若但以空言而講道學斷乎不可朱子洵稱大儒非泛言道學者所可比擬也康熙四十三年六月二十九

日

諭大學士馬齊起居注官滿保海寶

朕從來無代筆之人凡批出諭旨俱朕親書至朕覽過之書雖日月間隔不甚遺忘今雖年歲稍增而記性更進即目前陳列諸書內朕欲稽考某卷某字但指令近侍取之可以即得未嘗一次錯誤大約存心清虛不但事不遺忘即疾病亦寡康熙四十三年八月初三日

諭欽天監

朕用儀器測驗午正一刻十一分初虧未初三刻二分
食甚申初一刻復圓查七政歷未初三刻二分日月合
朔新法推算必無舛錯之理這舛錯或因誤寫字畫或
因算者忽略將零數去之太多亦未可定著詳察明白
具奏康熙四十三年十月初三日

諭兵部

曩洞庭湖用兵以需用船隻交與靳輔於江南備造遂
敗賊成功京口船隻皆巡防海道所用之船從前不加

修艚輒致朽壞隨處委棄朕所親見這水碓犁船總督阿山理應於江南地方親身速行督造乃欲委員赴浙江温州辦造明屬推諉殊為不合這船隻即交與阿山作速堅固造完毋致遲誤康熙四十三年十月初四日

諭戶部

山東比年歉收民生饑饉朕焦勞宵旰未嘗晷刻少釋於懷四十一年錢糧既分別減免帶徵又停四十二年

徵收蠲四十三年額賦截漕平糶發帑賑施遣用多員
分道贍養有就食京城者復分廠煮賑命滿漢官員資
送回籍並給以籽粒之需然後民間漸有起色今歲幸
風雨和調二麥畢登秋禾稔穫流移者悉返里閭復業
者咸安耕鑿朕於往來山東人等備加詢問深用心慰
但念被災之餘甫離重困若非大敷恩澤終不能遽底
盈寧著將山東省康熙四十四年應徵地丁銀米等項
除漕糧外通行蠲免從來水旱靡常撫綏百姓之道全

視大小官吏實心講求庶幾民有攸濟諭旨到日該巡撫卽飭有司張示曉諭務俾通省均霑實惠仍牘導小民撙節蓋藏期於比屋皆有餘蓄則於朕惓惓為民經畫之意可以無負矣爾部卽遵諭行特諭康熙四十三年十月初七日

諭戶部

朕昨歲南巡至浙江見其農桑徧野戶口蕃殖閭閻氣象較勝於三十八年巡幸之時甚為心慰浙省錢糧雖

前此屢經蠲貸而朕車駕經臨應更敷恩寬恤俾民生益加充裕當回鑾以後即擬免四十三年額賦因山東急賑災荒遂爾少緩曾頒有諭旨茲直省皆獲有秋特申前命康熙四十四年浙江通省應徵地丁銀米等項除漕糧外著俱行蠲免諭旨到日該督撫即嚴飭有司張示徧諭務使窮簷蔀屋均霑實惠地方大小官吏仍不時訓誡小民令各守分節用不論年歲豐歉咸有益藏庶無負朝廷殷殷愛養賜租給復之至意爾部即遵

諭行特諭康熙四十三年十月初七日

聖祖仁皇帝御製文第三集卷六